



GOBIÈRNU DI
KÒRSOU

Bo no por plania un kalamidat, bo por prepará p'e si!



kalamidat.an



Kontenido

Kon ta alertá bo?	4
Kon ta informá bo?	5
Pakete di emergensia	6
Evakuashon	7
Orkan	8
Inundashon	10
Warwarú	12
Tsunami	14
Epidemia	16
Kandela grandi	18
Disturbio di órden públiko	20
Atentado terorista	22
Peliger di derumbe	24
Krísis di koriente, awa òf elektrisidat	26
Supstanshanan tóksiko	28
Guion kòrtiku	30



Kon ta alertá bo?

Ora di kalamidat, Gobièrnu di Kòrsou ta trata di informá i alerta tur hende mas lihé posibel. E mihó reakshon di bo parti ta pa bai paden, sera porta i bentana i sende radio i televishon.

Pa medio di Radio di Emergensia riba e frekuensia 97.9FM, gobièrnu ta pasa tur informashon nesesario. Gobièrnu por opta pa alertá bo den un otro forma, por ehèmpel via di www.kalamidat.an òf asta via di bo telefòn selular.

Por fabor hasi loke ta pidi bo e momentu ei.



Kon ta informá bo?

Un kalamidat grandi ta haña hopi atenshon na radio i televishon. Na momentu di un kalamidat grandi, segun ta nesesario, gobièrnu por eksigí tempu di emishon serka diferente radio emisora i na televishon. E emisoranan mes ta duna hopi atenshon na loke a sosodé, pero e informashon ku nan ta duna no nesesariamente ta informashon ku ta yuda hende pa hasi loke ta mihó durante di un kalamidat. Pa duna e informashon korekto ta tarea di gobièrnu. Pero kada ciudadano tambe tin un tarea importante den esaki: Sòru pa bo ta na altura di prekoushonnan importante i di loke bo mester hasi durante i despues di un kalamidat. Duna atenshon na e echo ku kada kalamidat ta mará na su tipo di prekoushonnan. Asina bo por prepará delantá.

Riba e website www.kalamidat.an tin informashon aktual riba e tema di kalamidat. Por download i print e informashon aki òf buska e foyeto Kalamidat na diferente ofisina di gobièrnu. Bentana di Informashon ta alkansabel via 0800 - 1515 pa mas informashon tokante esaki.

Tuma nota: E number 0800 -1515 ta bira number di emergensia durante di un kalamidat, ora bo tin mester di informashon òf yudansa relatá ku e kalamidat. Not'é den bo telefòn òf plak e banda di bo telefòn di kas kaminda tur hende den kas por tin aksesu na dje ora ta nesesario.

Pakete di emergensia

Sòru pa semper bo tin un pakete di emergensia intakto den bo kas. Esaki ta duna abo i bo famia mas oportunidat pa sali bon for di un kalamidat. Aki bou tin un lista di produkto ku semper bo mester tin den kas. Bo mes tambe por agregá otro produkto, manera bo remedinan personal. Kontrolá kada seis luna si bo pakete di kalamidat ta kompleto i den bon kondishon.

E pakete

- Radio di bateria, program'é riba e frekuensia 97.9 FM ku ta Radio di Emergensia.
- Kaha di emergensia i deskripsjon kon pa us'é.
- Flèshlait ku bateria èkstra.
- Lusafe bon paketá kontra di humedat.
- Sèn kèsh i kopianan di papelnan di identidat i seguro.
- Yabinan èkstra di kas i outo.
- Mapa di besindario i un lista di numbertan di adrès di famia of konosi ku por ta bon pa bai skonde.
- Set di hèrmènt.
- 3 liter di awa pa dia pa kada hende den e kas, pa un mínimo di 3 dia.
- Kuminda ku no ta dañá pa un mínimo di 3 dia.
- Artíkulonon higiéniko, manera papel di wc, habon, habon pa laba paña, duki higiéniko, pasta di djente, skeiru di djente, etc.
- Remedinan den stòk.
- Bela



Evakuashon

Por sosodé ku pa motibu di un kalamidat bo tin ku bandoná bo kas diripiente.
Si esei ta e kaso hasi lo siguiente:

- Sera konekshonnan di gas, awa i elektrisidat
- Bai ku solamente e pertinensianan mas importante
(sèn kèsh, remedinan, kopianan di papelnan di identidat i seguro)
- Sera bo kas
- Kontrolá si bo bisiñanan ta na altura ku nan tin ku evakuá

Si bo tin mas tempu pa prepará pa un evakuashon i bo ta kere ku bo lo keda mas largu ku djis algun ora, hasi lo siguiente:

- Kue bo kaha di emergensia.
- Artíkulonan higiéniko, deken i paña èkstra
- Kòrda riba bo animalnan; bai ku kuminda i awa pa nan tambe



Orkan

LOKE ABO POR HASI

Promé ku mal tempu

- Sòru pa semper bo kas i bo kurá ta den bon kondishon, sin ku opheto lòs òf palu por hasi daño na bo kas ora di mal tempu
- Semper tin un pakete di emergensia den bo kas
- Sòru pa bo tin bo telefòn selular semper kargá
- Palabrá ku kada persona ku ta biba den bo kas un plan di emergensia; splika muchanan tambe kiko por sosodé na un manera komprendibel pa nan
- Keda vigilá e pronóstiko di tempu via radio, televishon òf **www.kalamidat.an**



Durante mal tempu

- Te kaminda bo mes por, trata na resolvé kualke daño promé ku yama timnan di reskate. Esaki ta evitá ku e liña di emergensia ta keda okupá konstantemente loke por stroba esnan den mas nesesidat
- Ora tin mal tempu ta rekomendabel pa keda paden i sigui radio, televishon òf **www.kalamidat.an**

Despues di mal tempu

- No sali kaya òf subi laman si a deskonsehá esaki
- Si tòg pa un motibu òf otro bo mester sali for di kas, bai ku suficiente kuminda, awa, deken, èkstra paña pa bisti i bo telefòn selular bon kargá

LOKE GOBIÈRNU TA HASI!

Efektonan di un orkan por ta grave pa bo kas si bo no tuma prekoushon. Gobièrnu tin un Ofisina di Desaster instalá, kaminda tur instansia i servisio nesesario sa kiko pa hasi ora tin peliger, durante i despues di un orkan. E representantenan di e organisashon aki ta reuní regularmente, ta sigui desaroyonan lokal i internashonal i ta yuda avisá gobièrnu tokante e pasonan ku mester tuma.

Gobièrnu ta prepará lugánan pa keda (shelter) pa esnan ku ta kore peliger den nan mes kas. Tambe gobièrnu ta duna informashon i, den kaso di orkan, ta alarmá tokante e gravedat di e orkan. Pero ta bo mes tin e obligashon di informá bo mes i bo famia delantá i tuma e prekoushonnan nesesario.



Inundashon

LOKE ABO POR HASI

Promé ku inundashon

- Ora bo konstruí algu riba bo tereno, wak pa esei no stroba e fluho natural di awa pa dreña roi òf kloaka
- Yuda tene roinan den bo barío limpi
- Si bo ta biba den un barío kaminda inundashon a yega di sosodé, traha bo plan di emergencia huntu ku bo famia i bo barío.
- Warda pertenensianan, manera papelnan importante, pa nan por keda seku
- Warda numbernan di emergencia den bo telefòn selular òf un kaminda visibel banda di bo telefòn di kas



Durante di inundashon

- No yama e numbertan di emergensia si no ta realmente nesesario.
Mester evitá pa liñanan di telefòn bira muchu okupá pa por laga espasio pa yuda esnan mas den nesesidat
- No subi kaya si outoridatnan avisá kontra di esaki
- Si bo kas ta yena ku awa, purba subi un kaminda ku ta mas haltu den bo kas
- Deskonektá aparatonan elektróniko i konekshonnan di gas
- Yuda mucha chikitu, hende grandi i hende desabilitá. Korda riba bo animalnan tambe.
- Si bo ta premirá ku bo no por yuda bo mes i bo famia, yama e number di emergensia 199 òf yama 0800-1515 pa mas informashon

LOKE GOBIÈRNU TA HASI!

E chèns di un inundashon semper tei ora bo ta riba un isla. Mas ainda dor ku tin kambio di klima ku ta okashoná ku e peliger di inundashon ta bira mas grandi i e resultadonan di inundashon tambe por bira pió.

Gobièrnu ta invertí den mehorashon di infrastruktura i limpiesa di roi i kloaka pero tòg kos por sali for di man. Mal eksperensha a pone ku tur instansha involví a uni forsa pa reashoná mas mihó ora ku inundashon afektá nos isla.



Warwarú

LOKE ABO POR HASI

Semper sòru pa bo kas i kura ta den bon estado i limpi di ophetonan pisá ku pa motibu di bientu fuerte por forma un peliger pa bo kas i pa hende. Trata di sigurá bo kas kontra di dañu pa motibu di mal tempu.

Durante di un warwarú

Si bo mira un warwarú forma i move den direkshon kaminda bo ta, drenta paden mesora i buska refugio den un kamber ku ta mihó protehá kontra di bientu.



Despues di warwarú

Si bo kas a sufri daño, alarma outoridatnan, por ehèmpel via di number di emergensia 911. Sali for di paden di e kas pa evitá ku muraya i/òf dak por basha abou riba bo. Wak pa bo duna yudansa na otronan den bo bario.

Sigui tur órden di outoridat. Gobièrnu lo sòru pa lugá pa keda pa esnan ku a pèrdè kas, pero preferibel pidi refugio serka famia òf konosínan.

LOKE GOBIÈRNU TA HASI!

Warwarú ta algu ku ta forma diripiente durante sierto sirkunstansia di tempu. Ora un warwarú hasi daño na un òf mas bario, gobièrnu ta evaluá e grandura di e daño i e efekto riba komunidat. Si e efekto ta grandi pa un parti signifikante di nos komunidat, gobièrnu por disidí pa anunsia un estado di kalamidat.

Esei ta nifiká ku for di e momentu ei, tur instansia i organisashon enkargá ku kalamidat ta kuminsá funshoná sigun plan di kalamidat.



Tsunami

LOKE ABO POR HASI

Durante di un tsunami

Un tsunami no ta tuma dia i ora pa forma pero por yega nos kosta den mas o ménos 20 minüt despues di un temblor den nos region. No tarda niun ratu so ora bo risibí alarma di tsunami. Sigur ora bo ta den besindario di kosta.

Kue tur miembro di bo famia i sòru di subi mas lihé posibel, den algun minüt, un kaminda mas haltu i mas leu for di kosta. No tarda pa motibu di buska bo pertenensianan. Bo bida tin mas balor.



Despues di un tsunami

No bai hasi kos di kaweta pa bai wak kiko a sosodé den e área kaminda e tsunami a okashoná. E por ta peligroso ainda. Informá outoridatnan unda bo ta despues ku bo a logra di instalá bo mes i bo famia den un área mas sigur.

LOKE GOBIÈRNU TA HASI!

Último añanan Servisio Meteorológiko ta sigui tur desaroyo pa loke ta trata tsunami. Kòrsou ta den un zona kaminda por okashoná un tsunami pa motibu di temblor den fondo di laman.

Un komishon speshal ta identifiká den nos region unda tsunaminan por kuminsá. Tambe nan ta trata di investigá kua ta e efektonan di un eventual tsunami riba Kòrsou i kua ta e áreanan ku ta kore mas peliger.



Epidemia

LOKE ABO POR HASI

En realidat abo mes no por hasi nada pa evitá un epidemia. Loke sí bo por hasi ta sòru pa un kalamidat asin'aki pasa mas seif i responsabel posibel.

Promé ku un epidemia

- Sòru pa bo tin un radio ku ta traha riba bateria
- Instalá e emisora di kalamidat (97.9 FM) riba bo radio i òf televishon
- Sòru pa bo tin stòk di kuminda den kaso di emergensia den kas



Durante un epidemia

- Semper usa lensu di papel ku bo por tira afó mesora despues di uso
- Tapa boka ora nister òf tosa
- Laba man regular
- Keda kas si bo tin un malesa contagioso
- Keda leu for di hende ku ya ta kontaminá ku e malesa
- Tuma kontakto ku bo dòkter di kas si bo tin e síntomanan

LOKE GOBIÈRNU TA HASI!

Un vírus nobo òf kualke otro malesa contagioso por afektá hopi hende pareu. Un epidemia por tin konsekuensianan grandi pa komunidad. Dòkter i verplegsternan ta bai ta hopi drùk i algun kompania no por sigui funshoná ya komo ku tin tiki trahadó.

Transporte públiko ta bai kore ménos òf asta por bai plat. Sektor di Salubridat ta konsiente di loke nan ta responsabel p’e na momentu di un epidemia. Especialmente pa loke ta trata informashon i konsientisashon.



Kandela grandi

LOKE ABO POR HASI

Na momentu di un kandela grandi tin diferente kos ku abo por hasi.

Promé ku un kandela grandi

Sòru pa bo ta na altura di e plan di evakuashon na bo trabou òf di otro edifisionan kaminda bo ta regularmente. Si no tin un plan di emergensia pa e edifisio kaminda bo ta traha, tuma kontakto ku outoridatnan di brantwer pa traha huntu ku bo koleganan riba un plan.



Durante un kandela grandi

- Yuda mucha i hende ku no por yuda nan mes i sali ku nan mas lihé posibel for di e edifisio
- Si bo no por mira bon mas dor di e huma trata di keda serka di suela
- Muha algun pida paña pa pone dilanti nanishi i boka
- Sera tur bentana ku porta tras di bo
- Yama 911 si brantwer no ta avisá ainda
- No usa left. Trapi ta mas sigur.
- Bo no por bandoná e edifisio mas? Bai para den un bentana ku ta tira pa kaya di moda ku brantwer por mirabo
- Nunka bai bèk den un edifisio ku ta na kandela

LOKE GOBIÈRNU TA HASI!

Na momentu di un kandela den un fregá di wowo tur kos ta disparsé. Esaki por kambia bo bida kompletamente. Kandela den bo kas bo mes por prevení. Esei gobièrnu no por hasi pa bo. Uniko kos ku gobièrnu por hasi ta informábo.

Gobièrnu a traha un plan di emergensia pa kandelanan grandi den un barío òf den un edifisio. E plan aki ta pa evitá ku tin víktima. Huntu ku esaki ta importante pa bo mes tambe ta prepará pa un posibel kandela grandi.



Disturbio di órden públiko

LOKE ABO POR HASI

Ora bo ta bishita un konsierto, demonstrashon of wega di deporte, bo no por hasi mu-
chu pa evita un disturbio. Pero si ta importante pa bo sa kiko pa hasi den un situashon
asina.

Prome ku un disturbio

Semper wak unda tin salidanan di emergencia ora bo dreña un edifisio of tereno di
evento. Esaki ta hasié mas fasil ora bo tin ku sali den pura.



Durante di un disturbio di órden

- Si okashoná disturbio durante di un evento grandi, no purba bai kontra di fluho.
- No bai kaminda tin disturbio.
- Keda trankil i sigui instrukshon di outoridatnan.

LOKE GOBIÈRNU TA HASI!

Bo por haña bo mes diripiente den disturbio, sakeo òf un bringamentu formal sin ku bo tin algu di haber kuné. Òf bo ta bishita un evento grandi ku hopi bishitante. Ora algu sosodé, tur hende ke sali mas lihé posibel for di e edifisio òf e tereno.

Pa sòru pa algu asina bai mas organisá i trankil posibel, outoridatnan i organisadónan di evento ta tuma prekoushonnan, manera kria salidanan di emergensia i guia e públiko.



**Atentado
terrorista**

LOKE ABO POR HASI

Kiko abo por hasi si tin menasa di un atentado di bòm òf si esaki realmente tuma lugá?

Ora tin menasa di atentado terrorista:

- Si bo mira un pakete sospechoso òf un situashon ku no ta normal, keda leu.
- Yama 911 i avisá tur hende den bo bisindario.



Durante un atentado terorista

- Skucha e Radio di Emergencia 97.9 FM
- Sigui tur instrukshon di gobièrnu i tim di kalamidat
- Protehá bo mes kontra ophetonan ku ta kai for di laira
- Yuda otro mas tantu posibel
- Keda for di bisindario di bentana (nan por kibra) i tambe outonan di parker (nan por eksplotá)
- No usa lusafè òf laiter (dor di peliger di eksploshon di gas)
- Duna polis tur informashon ku por yuda den investigashon, manera potrènan ku bo a saka ku bo selular òf kamara digital
- Na momentu di un atentado wak televishon i skucha radio regular òf wak informashon riba www.kalamidat.an
- Bai mas lihé posibel na un lugá kaminda no tin edifisio
- No bai wak bèk na e lugá di e atentado
- No bai para den grupo. Mas bòn por eksplotá

LOKE GOBIÈRNU TA HASI!

Organisashonnan importante den un pais manera kuerpo polisial i hustisia ta traha hopi huntu pa redusí e chèns riba un atake terorista. Di e forma ei nan ta interkambiá informashon ku otro i sòru pa adaptá leinan i reglanan.

Tambe nan ta traha huntu ku otro paisnan pa prevení atentado. Tur medida pa kombati terorismo por hasi e chèns riba un atentado chikí ounke no semper ta prevení esaki.



**Peliger di
derumbe**

LOKE ABO POR HASI

Ora tin derumbe di un edifisio grandi ta hopi importante pa bo sa kiko bo tin ku hasi.

Promé ku derumbe di edifisio

- Sòru pa semper tin un radio ku ta traha riba bateria
- Programá e radio di emergensia 97.9 FM riba bo radio, televishon òf www.kalamidat.an
- Sòru pa bo tin stòk di kuminda den kaso di emergensia den kas (wak página 4)
- Semper wak rònt pa bo sa unda e salida di emergensia ta ora bo ta den un edifisio deskonosí. Esaki pa sigurá ku bo por sali na momentu di peliger.



Durante di un derumbe

- Keda riba suela, skonde bou òf banda di un muebel pisá òf kozein di porta; keda sinta ketu einan i protehá bo kabes i garganta ku bo mannan
- Keda leu for di spil, portanan di glas i ophetonan pisá wardá den kashinan ku por hasibo daño
- No usa left. Trapi ta mas sigur.
- Trata na paga kandelanan chikí si tin

Despues di un derumbe

- Paga tinu pa posibel wayanan di koriente deskonektá
- Notifiká e tim di kalamidat unda bo ta, eventualmente via bo telefòn selular yama 911.
- Si bo keda tapá bou di restunan di piedra ku blòki, keda mas ketu posibel eibou i trata na hasi sonido riba kualke pipa òf tubu. Grita únikamente si no por otro pa asina spar oksígeno.

LOKE GOBIÈRNU TA HASI!

Kasnan i edifisionan na Kòrsou mester kumpli ku sierto eksigensia di konstrukshon ku gobièrnu a stipulá. Apesar di esei tin edifisionan ku un konstrukshon hopi bieu ku un ora pa otro por basha abou. Por ehèmpel ora ta trata di un edifisio ku daño okashoná pa un temblor, kandela, eksploshon òf mal mantenshon.



**Krisis di koriente,
awa òf telefon**

LOKE ABO POR HASI

Koriente

Ora despues di un kalamidat koriente ta kai afó, ta importante pa bo tin un radio disponibel ku ta traha riba bateria. Programa su frekuensia kla riba 97.9FM ku ta frekuensia di Radio di Emergencia. Asina bo mes por tende kiko ta sosodé i kiko bo mester hasi.

Awa

Por sosodé ku ta sera e ret di awa òf ku awa ta bira kontaminá. Pa e motibu ei ta importante pa bo tin un kantidat di bòter di awa den kas: 3 liter pa dia pa kada persona den kas, pa un mínimo di 3 dia. Ta importante pa regularmente kambia e awa aki pa awa fresku.



Telefòn

Despues di un emergensia hopi hende ta kuminsá yama otro. Esaki por resultá den un ret di telefon muchu okupá. No usa telefon innesesariamente i si bo tin ku yama, keda alkaso i kòrtiku. Si e ret di telefon kai afó, skucha Radio di Emergensia 97.9FM, riba bo radio ku ta traha riba bateria. Asina lo bo haña informashon tokante kiko ta sosodé, kiko bo por hasi i kon pa dreña den kontakto ku polis òf ambulans.

Promé ku koriente, awa òf telefon kai afó

- Sòru pa bo disponé di un radio ku ta traha riba bateria i èkstra bateria
- Pone e radio riba e frekuensha 97.9 di Radio di Emergensia
- Traha un pakete permanente di emergensia pa warda den bo kas

Ora koriente, awa òf telefon kai afó

- Skucha Radio di Emergensia 97.9FM
- Informá si bo bisiñanan tin mester di bo




**Supstanshanan
tóksiko**

LOKE ABO POR HASI

- Si bo ta pafó di kas, drenta bo kas lihé, sera porta i bentana i evitá ku e airu tóksiko por drenta bo kas via de ekipo di ventilashon manera èrko.
- Skucha bon na radio i televishon kiko bo mester hasi.
- Si bo no ta den besindario di bo kas, kana duars riba bientu pa bo sali for di e fluho di airu, ku un lensu dilanti di bo nanishi i boka.





LOKE GOBIÈRNU TA HASI!

Supstanshanan inflamabel, ku por eksplotá òf ku ta tóksiko, manera gas, vürwèrk i amoniak- ta kos ku industrianan na Kòrsou sa usa. Tin eksigensianan estrikto pa loke ta trata kon pa usa i warda e supstanshanan i produktonan aki.

Si tòg un di e supstanshanan plama bo tin ku skucha kon pa reakshoná riba esei, pasobra kada supstansha tin su manera di reakshoná. Gobièrnu ta alertá via di radio i televishon. No ta fásil pa rekonosé e peliger di supstanshanan tóksiko. Bo por haña kimamentu di wowo, tosamentu, walmentu di stoma òf grawatashi.

GUION KÒRTIKU

Bo a tende ku tin un kalamidat?

Bai paden i sera porta i bentana.

- Skucha radio òf televishon i sigui e informashon riba Radio di Emergencia 97.9FM.
- Wak riba www.kalamidat.an pa mas informashon.
- Sigui instrukshon di gobièrnu i e instanshanan di yudansa.
- No bai buska bo yunan for di skol; skol mes tin su plan di emergensia.
- Yuda otro mas tantu posibel.
- Ni maske telefòn ta traha ainda, no bai yama innesesariamente. Asina ta evitá muchu peso riba e ret di telefòn.

Mal tempu: Orkan, inundashon i warwarú

- No subi kaya si outoridatnan pidi bo keda kas òf si tin menasa di mal tempu
Sòru pa semper tin bo pakete di kalamidat kla na kas. Kòrda riba bateria, radio, flèshlait, remedi, èkstra paña, papelnan importante, kuminda ku no ta dañá pafó di frishidèr i sufisiente awa pa sikiera 3 dia.
- Instalá adelantá bo lugá di skonde den bo kas.

- Yama 911 si bo tin mester di yudansa of 0800-1515 pa mas informashon.

Tsunami

- No tarda niun momento ora bo risibí alarma di tsunami. Sigur ora bo ta den besindario di kosta. Kue tur miembro di bo famia i sòru di subi mas lihé posibel, den algun minüt, un kaminda mas haltu i mas leu for di kosta. No tarda pa motibu di buska bo pertenensianan. Bo bida tin mas balor.

Supstanshanan tóksiko

- Keda paden i sera tur porta i bentana. Tambe sera tur instalashonku ta sòru pa ventilashon, manera erko.
- Skucha Emisora di Emergencia i wak riba www.kalamidat.an
- Bai den un kamber kaminda no ta dreña airu for di pafó, preferibel den sentro di e kas.
- Si en kaso bo ta pafó, kana duars riba bientu ku un duki dilanti di bo nanishi i boka.



Kandela grandi

- Bo no por mira mas dor di e huma? Bai drumi abou.
- Bo no por sali for di edifisio? Bai para na bentana pa bombero mirá bo.
- Nunka no dreña bèk den e edifisio ku ta na kandela.

Atentado terorista

- Bai na un lugá habrí, leu for di edifisio grandi.
- Duna polis bo potrètanan (saká ku telefòn selular òf kámaradigital).
- No bai wak kaminda e atentado a tuma lugá.

Epidemia

- Semper sigui instrukshonnan di e ofisina Epidemiólogo
- Usa papel pa supla nanishi un biaha so i deshasí mesora di dje.
- Laba bo mannan regularmente.
- Keda kas ora bo tin un malesa ku bo por pega otro kuné.

Peligro di derumbe

- Keda abou na suela, skonde bou di mobilario pisá òf kozein-di porta. Protehá bo kabes i garganta ku bo mannan.
- No usa left. Trapi ta mas sigur.
- Si bo ta drumi bou di restunan di piedra ku blòki, keda drumi mas trankil posibel i purba di hasi sonido riba pipa i tubu. Evitá di grita innesesariamente pa bo spar oksígeno.

Disturbio di órden públiko

- Si okashoná disturbio durante di un evento grandi, no purba bai kontra di fluho.
- Keda trankil i sigui instrukshon di outoridatnan.
- No bai kaminda tin disturbio.



